

Radund 80 novas plazzas da lavur

Cazas: Nov stabiliment giudizial serrà

DA GION NUTEGN STGIER / ANR

■ En la sessiun d'avust duai il cussegl grond dar glisch verda per la nova construcziun dad ina praschun a Realta en la vischnanca da Cazas. Quel project custa al chantun 119 milliuns francs e bunamain ina terza da quella expensa surpiglia la confederaziun. A partir dal 2019 è lura la praschun Sennhof a Cuira istorgia.

Ier han ils cussegliers guvernativs *Mario Cavigelli* e *Christian Rathgeb* sco er *Markus Dünner*, il schef da l'uffizi da construcziun auta, preschentà a Cuira ils plans per la nova praschun. Realisada duai quella vegnir en la vischnanca da Cazas e quai a Realta. Ella duai remplazzar la praschun Sennhof a Cuira che na correspunda oz betg pli al standard da segirezza, il manaschi n'è betg pli optimal ed ils collavuraturs en schizunt per part en privel. Ultra da quai è quella praschun serrada cun 57 plazzas memia pitschna cun s'augmentar la dumonda per posts per arrestar ils delinquents permanentamain. «Nus avain analisà la situaziun, mess sin maisa quatter variantas ed a la fin decidì da construir ina nova praschun», ha ditg cusseglier guvernativ Mario Cavigelli.

Er la confederaziun sustegna quella varianta

Quella soluziun saja segir la meglra ord vista da segirezza, dentant er da l'entir decurs da lavurar. Dal reminent sustegna la confederaziun la serrada da la praschun dal Sennhof e la construcziun dal nov stabiliment giudizial a Re-

alta. Las localitads, ch'èn concepidas specificamain per il manaschi da praschun, na pon betg vegnir duvradas per autras activitads administrativas. L'areal dal Sennhof duai vegnir cedì a terzas persunas per in nov intent. Cun la realisaziun da la nova praschun a Realta e cun serrar la praschun dal Senn-

hof va uschia a fin sunter 200 onns inagronda istorgia. En la nova praschun vegnan a lavurar 110 persunas e da quellas vegnan occupadas 80 dal tuttafatg da nov. Plinavant pussibilitescha la concentraziun da l'execuziun giudiziala a Realta da trair a niz differentas sinergias cun ils manaschis vischins, la

praschun existenta ed averta cun 100 posts.

Da nov 152 plazzas per delinquents

La regenza propona al cussegl grond da laschar construir in stabiliment giudizial serrà cun totalmain 152 plazzas. Planisadas èn 10 plazzas en la partiziun

d'entrada, 100 plazzas per l'execuziun normala, 20 plazzas per delinquents cun disturbis psichics sco er 10 plazzas en la partiziun da vegliadetgna. Totalmain 12 plazzas èn previsas per l'execuziun da l'arrest d'inquisiziun, per l'execuziun da chastis da dunnas e da juvenils sco er per chastis da detenziun subsidiars. Per il project dissegna dal biro d'architettura D. Jüngling + A. Hagmann da Cuira vegni quintà cun custs d'investiziun da 119 milliuns francs. Da quella summa surpiglia la confederaziun circa 33 milliuns francs e las investiziuns nettas dal chantun importan pia var 86 milliuns francs. Al cussegl grond vegn suttamessa quella summa e betg la summa totala dal project.

In mir cun ina otezza da set meters

Circumdà vegn l'areal da la praschun cun ina surfatscha da set hectaras cun in mir ed ina saiv cun ina otezza da set meters. Er il mastergn dal conturn vegnia a pudair profitar da la domiciliaziun da questa praschun dal concordat da la Svizra orientala, ha menziunà cusseglier guvernativ Christian Rathgeb. Er ord vista da l'economia publica saja il nov edifiz da gronda impurtanza per il chantun Grischun, ha ditg Mario Cavigelli. Cun las lavurs da construcziun dal stabiliment giudizial serrà a Realta duai vegnir cumenzà l'atun 2016, l'avertura è prevista il zercladur 2019. Lura duai il chantun far in gudogn da stgars trais milliuns francs grazia a la nova praschun e betg sco actualmain in deficit da radund 460 000 francs.



Han preschentà il project da la nova praschun a Cazas Realta: Markus Dünner, impressari chantunal ed ils dus cussegliers guvernativs Mario Cavigelli e Christian Rathgeb (da san.).

FOTO G. N. STGIER